

# Statutas della Romania

Objekttyp: **Group**

Zeitschrift: **Igl Ischi : organ della Romania (Societat de Students Romontschs)**

Band (Jahr): **35 (1949)**

PDF erstellt am: **20.07.2024**

## **Nutzungsbedingungen**

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

## **Haftungsausschluss**

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

# Statutas della Romania

## § 1

### Intent

La Romania ei ina societad el senn dils art. 60 sqq. dil CCS cun igl intent de mantener e promover la cultura romontscha, siu lungatg, siu spért, sia litteratura e historia.

La Romania secompona:

- a) della giuventetgna studentica de Surselva, Sutselva e Surmir,
- b) d' academichers, scolasts, glied ord il pievel e d' auters amitgs dil romontsch.

## § 2

### Realisaziun digl intent

Igl intent vegn realisaus entras:

- a) acziun individuala per la cultura romontscha,
- b) reuniuns e fiastas popularas;
- c) periodicas e publicaziuns occasionalas;
- d) instradar, promover e sustener autras ovras culturalas ed arranschaments che surveschan pil bien dil lungatg e dil pievel romontsch.

## § 3

### Condiziuns de commember

Commember della Romania daventa tgi che retrai Ischi e Tschespet.

## § 4

### **Organs**

Ils organs della Romania ein:

- a) la radunonza generala,
- b) la suprastonza.

## § 5

### **Radunonza generala**

La radunonza generala ha liug mintgamai la stad u igl atun. Ulteriuras radunonzas san vegnir convocadas dalla suprastonza tenor basegns.

## § 6

### **La suprastonza**

La suprastonza secompona de tschun commembers: president, vicepresidente, actuar e dus assessurs. De quels ein silmeins dus d'eleger ord las retschas dils students.

Il cassier fa part della suprastonza cun vusch consultativa.

## § 7

### **Organ consultativ**

La suprastonza sa tenor basegns scaffir in organ consultativ ed auxiliar per cheutras contonscher in contact pli stretg denter la suprastonza ed ils commembers. Fagend quei duei ella ton sco pusseivel sebasar sin organisaziuns existentas ellas valladas romontschas.

## § 8

### **Incumbensa della suprastonza**

La suprastonza ei igl organ executiv della Romania. Ella representa la Romania enviars igl interiur ed igl exteriur. Il president segna per la Romania, en siu stagl il vicepresidente.

Igl actuar fa ils protocols della suprastonza e della radunonza generala. Il cassier fa la cassa, administrescha igl archiv e procura la vendita dils cudischs vegls.

La suprastonza elegia tenor basegns e pusseivladad in secretari, che fa part dellas sedutas cun vusch consultativa.

## § 9

### **Elecciuns e votaziuns**

La suprastonza vegn elegida mintgamai alla radunonza generala entras scrutini, nunche la radunonza decidi unanimamein de far tscharna. Autras elecciuns e votaziuns vegnan fatgas cun tscharna, nunche duas tiarzas dils presents decidien autruisa.

## § 10

### **Prezi dellas periodicas**

Il prezi dellas periodicas vegn fixaus dalla radunonza generala ordinaria.

## § 11

### **Redactors e commissiun redaccionala**

Ils redactors dellas periodicas della Romania vegnan elegi mintgamai per treis onns.

Ultra dils redactors elegia la radunonza generala ina commissiun redaccionala de treis commembers ch'assistan als redactors cun plaid e cussegl.

## § 12

### **Exemplars de redacziun e separats**

Ils redactors san, ultra de lur honorari, che vegn fixaus dalla radunonza generala, retrer 25 exemplars dil respectiv organ. Quels surveschan per exemplars de recensium e per honorari dils collaborators. Tgi che retrai separats, astga buca distribuir quels avon che la vendita ufficiala dil cudischet seigi



finida. Auturs de lavurs pli grondas egl Ischi san giavischar diesch separats gratuits de lur lavur.

### § 13

#### Revisurs de quen

La suprastonza numna mintg' onn dus revisurs de quen che repassan tut ils quens della Romania.

### § 14

#### Liug della radunonza generala

Il liug della radunonza generala per igl onn futur vegn mintgamai proponius dalla radunonza generala e destinaus definitivamein dalla suprastonza.

### § 15

#### Exclusiun de commembers

La radunonza generala sa sclauder cun duas tiarzas dellas vuschs in commember che cunterfa agl intent della societad era senza indiar motivs.

### § 16

#### Cavaliers della Romania

Cavalier della Romania sa daventar tgi che fa alla Romania in regal de silmeins frs. 50.— ed inscriva siu num cun agen maun el «Cudisch della Guardia», conservaus egl archiv della Romania.

### § 17

#### Commembers d' honor

Cun duas tiarzas dellas vuschs presentas sa la radunonza generala numnar commembers d' honor della Romania persunas specialmein meriteivlas per il romontsch u per la societad.

## § 18

### Dissoluziun

Sche la Romania duess sedissolver u calar d'exister per munconza de commembers, duei sia facultad restar deponida duront vegn onns tier igl Uffeci circuital della Cadi e vegnir restituida alla societad en cass che quella sereconstituess. Quella canun croda la facultad alla Biblioteca romontscha della claustra de Mustér.

## SECZIUN DE STUDENTS

### § 19

#### Commembers

Ils students formeschan ina secziun della Romania.

### § 20

#### Lavur

La secziun de students enquera de contonscher igl intent della Romania entras:

- a) silmeins duas radunonzas annualas,
- b) las academias,
- c) l'ediziun della Talina,
- d) gidar a propagar nies moviment ora el pievel.

La secziun studentica promova plinavon las relaziuns e l'amicezia denter ils students e studegiai romontschs.

### § 21

#### Condiziuns de commember

Commember de quella secziun daventa mintga student cun la tiarza classa gimnasiala, mercantila, tecnica, dil seminari de scolasts u d'ina outra scola equivalenta, che:

- a) ademplescha las obligaziuns ordinarias sco commember della Romania,
- b) abonnescha la Talina.

## § 22

### **Organs**

Ils organs della secziun de students ein:

- a) la radunonza generala,
- b) il comite.

## § 23

### **Radunonzas generalas**

Ina radunonza generala dils students ha liug cun caschun della radunonza generala della Romania d'atun; ulteriuras radunonzas generalas dils students san vegnir convocadas tenor basegns dal comite. Ellas radunonzas dils students han ils auters commembers della Romania vusch consultativa.

## § 24

### **Comite**

Il comite secompona de treis commembers: il president, il vicepresidente ed igl actuar. Il president ei a medem temps commember della suprastonza cun dretg de substituziun entras vicepresidente u actuar.

## § 25

### **Elecziun**

Il comite dils students vegn elegius mo dals students ella radunonza generala d'atun.

§ 26

**Fiasta populara**

Il comite dils students arranscha en entelgientscha culla suprastonza cun caschun della radunonza generala della Romania ina fiasta populara.

§ 27

**Prezi dellas periodicas**

Ils students obtegnan las periodicas della Romania per in prezi reduciu.

---

Quels statuts ein vegni approvai ella radunonza generala della Romania dils 30 d' uost 1948 a Rueun ed ella radunonza della secziun studentica dils 26 de december 1948 a Trun.

Per la Romania:

Il president:

**Dr. Augustin Cahannes**

Igl actuar:

**Giusep Pelican**

Per la secziun studentica:

Il president:

**Donat Cadruvi**

Igl actuar:

**Fidel Caviezel**